

## **Sing vooraf staande: Psalm 68:8 (p. 333)**

- 8 Gods eng'lemagte bo die swerk / het, tien en tien maal duisend sterk, / slagvaardig uitgeswewe;  
by hulle is sy majesteit / 'n Sinaï in heiligheid, / deur bliksemlig omgewe.  
U het omhoog gevaar vol eer; / die kerker was u buit, o HEER, / en gawes u beloning  
wat neerdaal op die mensekind; / selfs wie opstandig is, dié vind / by U, o HEER, 'n woning.

Ons hulp is in die Naam van die Here wat die hemel en die aarde geskape het.  
Geliefdes, genade en vrede vir u van God ons Vader en die Here Jesus Christus deur die kragtige  
werking van God die Heilige Gees.

**Amen.**

## **Lofpsalm 66:7, 9 (p. 322)**

- 7 Kom luister toe, o Godgesinde! / Kom, almal wat die HERE vrees!  
Ek sal vertel aan al sy vrinde / wat Hy gedoen het aan my gees.  
Ek het geroep, God het geluister / toe alles nag was om my heen;  
en voor die lig skyn deur die duister, / was God my lof, net Hy alleen.
- 9 Lof sy Gods goedertierenhede, / sy Naam sy ewig lof en prys!  
Hy het gehoor na my gebede, / my onverhoord nooit afgewys.

**Gebed.**

- **Doksologie:**
- **Aanbidding:**
- **Skuldbelydenis:**
- **Vergifnis**
- **Dank:**
- **Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:**
- **Algemene bede:**
- **Verligting van die Gees ter wille van die Woorddiens:**

**Amen.**

## **Psalm 38:2, 8 (p. 189)**

- 2 In my dring u strafgerigte, / HEER, soos skigte / wat my hart deurboor soos staal.  
Ja, die hand wat hul gedryf het / in my lyf, het / self ook op my neergedaal.
- 8 HEER, U weet hoe hart en sinne / staan daarbinne / as ek worstel in my leed.  
Voor U is my sugte en sorgte / nie verborge, / daar U alles sien en weet.

**Skriflesing: Genesis 3**

**Teks: Genesis 3:8-19; Kategismus Sondag 4**

Adam en Eva het oortree. Toe vlug hulle uit vrees vir die straf wat daarop gaan volg.

- Hulle gewetes het hulle aangekla. Net soos dit met ons gebeur, het hulle skuldgevoelens ook oor hulle die oorhand gekry.
- Soms sluimer ons skuldgevoel, maar die Heilige Gees maak dit telkens weer wakker en dan vlug ons weg, net soos Adam en Eva, omdat die teenwoordigheid van die Here ons bangmaak.

Ons het egter meer nodig as net ons gewetes om te weet van al ons sondes en die straf van die Here, want ons is nie meer so volmaak soos Adam en Eva nie.

- Ons moet uit die Woord van God geleer word.
- Daarmee saam het ons die lig van die Heilige Gees nodig sodat ons alles reg kan begryp.

Ons leer drie dinge uit Genesis 3:

1. **Die Here het die reg om ons te straf, al wil ons nie glo dat ons sonde gedoen het nie.**
2. **Die straf is swaar omdat die sonde so groot is.**
3. **Die straf oor ons is ook verseker, al is God ook barmhartig.**

1. **Die Here het die reg om ons te straf, al wil ons nie glo dat ons sonde gedoen het nie.**

Die vraag is maar in enige mens se kop: Is dit nie tog onregverdig dat God die mens straf nie?

- Die Here weet mos dat ons nie uit onself beter kan nie.
- Net soos Adam ook gedoen het, ontken mense mos soms dat die oordeel van die Here regverdig is.
- Die bodem van die ontkenning van ons sondes is eintlik dat ons die Here die skuldige maak, want dis Hy wat die hele lewe met alle mense se doen en late bepaal het!
- Hy weet mos self hoe beperk die mens is.

Die groter saak wat ons moet uitmaak, is: Sal die Here dit verdra dat 'n sondige mens Hom daarvan beskuldig dat Hy onregverdig is?

- Die Here het tog die reg gehad om van die mens te eis om Hom te dien.
- Hy het ons immers presies vir daardie doel gemaak, en Hy het dit as rede vir ons bestaan gestel.

Die ware gelowige weet ook dat God ons ook nie net gemaak het nie – Hy het ons so goed gemaak dat ons Hom kon dien, as ons net wou!

- Die punt is dat die mens verander het. Hy het met allerhande skewe insigte en begeertes vorendag gekom.
- Die Here het nie verander nie, maar die mens het verkeerd geraak. Die Here openbaar dit aan ons in Prediker 7:29:

**Kyk, net dit het ek uitgevind: dat God die mens reg gemaak het, maar hulle het baie slim planne gesoek.** (Prediker 7:29 AFR1953)

- Dit staan net in ander woorde in Miga 6:8 neergeskryf: Die Here het van ons niks anders gevra nie, as net dat ons Hom reg moet dien.

**Hy het jou bekend gemaak, o mens, wat goed is; en wat vra die HERE van jou anders as om reg te doen en liefde te betrag en ootmoedig te wandel met jou God?**  
(Miga 6:8 AFR1953)

Opsommend:

- Die gebod van die Here is nog net so heilig soos altyd.
- Dit is ons wat deur die sonde onmagtig geword het en ons werklike adel verloor het.

As ons so hopeloos geskape was dat ons niks goeds kon doen nie, kon ons voel dat die Here se straf onregverdig is. Maar nou is die saak heeltemal anders.

- Die Here is goed en reg.
- Daarom is alles wat Hy skape ook goed en reg – ook die mens.
- So was dit: Totdat die mens besluit het om sy rug op sy Skepper te draai, was hy volmaak en sonder sonde

Van daardie oomblik af is die mens 'n baie moedswillige skepsel.

- Ons weerstaan God en sy wet.
- Ons hou ons doof vir die Heilige Gees en blind vir God se genade.
- Ons sondig voluit, met alles in ons – ons krag en verstand.

*Eers kon ons sonder sonde lewe, maar toe wou ons nie. Nou kan ons nie sonder sonde lewe nie, en ons wil ook nie.*

Die beste van alles is dat mens onder sulke omstandighede mense kan kry wat glo dat hulle sonder sonde is en dan hulle lewe regverdig met die sondes van ander mense.

- Net soos Adam is ons ook meestal geneig om die skuld op iemand anders te pak as ons misluk en ons foute maak.
- Maar God is nog net so heilig as wat Hy was toe Adam geskape is en daarom sal ons almal gestraf word deur sy regverdigheid. Want die oortreding lê by ons.

## **2. Ons bely dat God alles met 'n regverdige oordeel tydelik en ewiglik straf.**

Dit is toe presies wat met Adam gebeur het.

- Hy is swaar gestraf oor die groot sonde wat hy gedoen het, al het hy probeer om homself te verontskuldig met Eva se oortreding.
- Die dorings en distels sal sy handewerk op die aarde vernietig.
- Wanneer sy werk eendag volbring is, sal hy die dood sterwe. Sy liggaam sal weer stof word soos wat dit was voordat God hom geskape het.

Van toe af het sonde 'n groot probleem geword.

- Dis nie net ons daaglikse oortredinge teen God en medemens wat die probleem veroorsaak nie.
- Dis ook dié wat ons erf.
- Vir al hierdie sondes word ons gestraf met die swaar straf van die dood.

Ons word van die lewenswortel afgesny – liggaamlik en geestelik.

- Liggaamlik – want ons liggame gaan dood. Ons ontbind totdat daar van ons pragtige liggame niks oorbly nie.
- Geestelik – omdat ons sondes ons van 'n blyplek in die doderyk verseker.
- Hierdie straf is ewig, en elke lewensdag gaan onder die straf gebuk.

Ons straf is eintlik ook nog meer as dit, want dit maak in hierdie lewe al die deur oop sodat die duiwel ons verder kan verderf, as God hom dit toelaat.

- Daarom word ons geteister met siekte, smart en hartseer en met teëspoede van allerhande soorte op elke lewensgebied.
  - Ons sukkel in ons werk, huweliksluwe, gesinslewe, politiek, ens.
- So buig gelowige en ongelowige onder die magte van ongehoorsaamheid.

Dan volg daar nog die besondere straf wat die Here wegbêre vir dié wat nie uitverkore is nie.

- Hulle word in die finale oordeel niks verskoon nie.
- Hulle word in die ewige duisternis verseël – dis die hel, waar daar baie plek is vir wanhoop, verwyte en duisternis.
- Die Here sê daar brand 'n onuitbluslike vuur.

## **3. Hierdie straf is oor ons ook verseker, maar ons word alles vergewe deur die Here Jesus Christus.**

Vraag 11 van die Heidelbergse Kategismus vra of die Here ons dan nog gaan straf, terwyl ons tog weet dat Hy barmhartig is.

- Natuurlik! Barmhartigheid beteken tog nie dat ons die Here tot in die oneindigheid toe kan bly versondig en dat die Here maar net moet bly vergewe nie!
- As God die sonde nie straf nie, sou Hy nie God wees nie.

- As die sonde nie gestraf word nie, beteken dit dat God nie teen die duiwel opgewasse is nie.

Daarom moet God alle sondes na behore straf, as Hy die duiwel ook na behore wil straf.

- Sondes word deur die duiwel en sy magte bewerk.
- God moet sy heiligheid voor en teenoor hulle handhaaf. Daarom moet Hy alle sondes met die hoogste denkbare straf straf.

Dit beteken nie dat God nie genadig is nie.

- God se straf oor Adam en Eva kon amper nog gehoor word, toe gee die Here al aan hulle die belofte van verlossing.
- Iemand uit die nasate van hierdie in sonde gevalle Eva gaan die slang se kop vermorsel. Christus sal gebore word, en Hy sal ons straf dra. Hy sal die pad terug na die hemel toe oopmaak.

Ons staan nie meer met hierdie belofte in die hand nie – die Here Jesus Christus sal nie meer kom nie.

- Hy het klaar gekom. Ons lewe met die vervulling van hierdie belofte.
- Hierdie Here Jesus Christus het egter 'n skerp skeiding kom bewerk.
  - Aan die een kant het Hy redding bewerk vir diegene wat
    - aan sy verlossing glo en
    - elke oomblik onder die geklank van die Heilige Gees se stem strewe na 'n beter lewe.
  - Maar aan die ander kant het Hy die dood en verwoesting verseker oor dié wat God met 'n slegte lewe versoek. Daar is vir hulle nie genade nie.

Luister en word bekeer.

- Daar is geen sonde wat God nie vergewe nie, behalwe die sonde teen die Heilige Gees.
- Dis die sonde om te weet, en te hoor, maar om God se genade te verwerp.

Maar vir al ons ander sonde het daar 'n kruis gestaan, waaraan die Seun van God gestraf is.

- Aan daardie kruis het Hy God se vloek oor ons en die aarde oorwin.
- Daarmee saam het Hy die deure na die ewige lewe toe vir ons oopgesluit as ons ons bekeer.

Kom ons lees saam wat oor al hierdie dinge in ons belydenis geskryf staan in die Heidelbergse Kategismus Sondag 4:

**Vraag 9: Doen God die mens dan nie onreg aan as Hy in sy wet van hom eis wat hy tog nie kan doen nie?**

**Antwoord:** Nee (a), want God het die mens so geskep dat hy dit kon doen (b). Maar die mens het homself en sy hele nageslag as gevolg van die aanhitsing van die duiwel (c) en deur moedswillige ongehoorsaamheid van hierdie gawes beroof.

(a) Ef 4:24. (b) Gen 3:13; 1 Tim 2:13, 14. (c) Gen 3:6; Rom 5:12.

**Vraag 10: Wil God hierdie ongehoorsaamheid en afval ongestraf laat bly?**

**Antwoord:** Nee, glad nie; intendeel, sy toorn is verskriklik (a) sowel oor die erfsonde as oor die sonde wat ons self doen: Hy wil dit in die tyd en in die ewigheid met 'n regverdig oordeel straf (b). Hy het immers gesê: "Vervloek is elkeen wat nie bly in alles wat geskryf is in die boek van die wet om dit te doen nie" (c).

(a) Gen 2:17; Rom 5:12. (b) Ps 50:21; 5:6; Nah 1:2; Eks 20:5; 34:7; Rom 1:18; Ef 5:6. (c) Deut 27:26; Gal 3:10.

**Vraag 11: Is God dan nie ook barmhartig nie?**

**Antwoord:** God is wel barmhartig (a); maar Hy is ook regverdig (b). Daarom eis sy geregtigheid dat die sonde wat teen die allerhoogste majesteit van God gedoen is; ook met die swaarste straf gestraf moet word dit is met die ewige straf aan liggaam en siel.

(a) Eks 34:6, 7; 20:6. (b) Ps 7:10; Eks 20:5; 23:7; 34:7; Ps 5:5, 6; Nah 1:2, 3.

**Amen.**

Slotgebed.

Slotpsalm 89:16,17 (p. 447)

- 16 Sy teëstander, HEER, het U bo hom verhef, / sy vyand bly gemaak, sy swaard kan nie meer tref;  
sy heldehart is weg, geen krag meer in sy hand nie;  
sy glanse het verbleek, sy troon hou nie meer stand nie;  
sy jeug het U verkort deur smaad wat hom oordek het.  
Hoe lank nog?... HEER, hoe brand die vlam wat U gewek het!
- 17 Gedenk, o HEER, hoe swak ek is: hoe kort van duur, / hoe nietig my bestaan, die dood wink ieder uur.  
Wie leef daar wat die dood nie eenmaal sal aanskou nie?  
Geeneen wat teen die mag sy lewe kan behou nie.  
Skenk ons u guns, o HEER, help ons in donker stonde / na u belofenis, aan Dawids huis verbonde.

Die genade van die Here Jesus Christus en die liefde van God en die gemeenskap van die Heilige Gees bly by u almal.

**Amen.**

Dr MJ du Plessis  
Gereformeerde Kerk Bellville  
Datum: 20 Maart 2011